

安陽縣金石錄

安陽縣金石錄卷第五

懷師武虎谷先生著

安陽縣知縣鐵嶺貴 泰校梓

宋

高勲造像記

案記正書在萬佛溝前已磨泐後半題高勲妻趙氏女大
姐二姐孫女什姐五人等願隨彌勒下生同正口來之果
咸平四年二月十五日

李密造像記

案記正書在萬佛溝文云元口村重佛弟子李密妻張氏
次妻和氏與合家眷屬母弟李丙妻王氏男李口妻郭氏

李能妻周氏姪留哥孫子周哥小哥咸平四年二月十五日字拙滯

都維許氏造像記

案記正書在萬佛溝洞側文云光嚴村佛女弟子都維許氏另行書邑人楊氏王氏諸女流後又書男弟子邑人口馬莫張客等最後書咸平四年字多暈暗不可辨

光嚴村造像記

案記正書在萬佛溝字多剝蝕惟前題光嚴村另行有佛弟子李字下多不可識末行題咸平年十一月十五日不云幾年上書者脫文也

天池石刻

佚

徐憲撰天池記憲於髫髻時見池後石佛座上刻天池村三字太宗天禧元年正月二十日其名蓋舊有之

相州新脩園池記

佚至和三年三月

相於河朔爲近藩而地據形勝西走鎮定之衝屯師積穀與邊鎮相左右然當無事時州之武備日懈不嚴至五兵不設庫散處於廳事之廊廡間敗壞堆積莫可詳閱郡署有後園北逼牙城東西幾四十丈而南北不及百尺雖有亭榭花木而扼束蔽密隘陋殊甚牙城之北乃有官蔬之圃縱廣半夫中有廢臺巍然荆棘蒙沒州但以其基正圓有道回環而上

如螺殼然故以抱螺名之雖老胥宿校不能知興廢之由予
之來雖以病不堪事然猶不敢偷安自放而忘治之所急於
是闢牙城而北之三分蔬圃之地其一居新城之南西爲甲
仗庫凡五十六間由是兵械百萬計始區而別焉以庫東之
餘地通於後園由是園之南北始與東西均焉又於其東前
直太守之居建大堂曰書錦堂之東南建射亭曰求己堂之
西北建小亭曰廣春其二居新城之北爲園曰康樂直廢臺
鑿門通之治臺起屋曰休逸得魏冰井廢臺鐵梁四爲之柱
臺北鑿大池引洹水而灌之有蓮有魚南北二園皆植名花
襍菓松柏楊柳所宜之木凡數千株既成而遇寒食節州之
士女無老幼皆摩肩蹠武來遊吾園或遇樂而留或擇勝而

然歎賞歌呼至徘徊忘歸而知天子聖仁致時之康太守能
宣布上恩使吾屬有此一時之樂則吾名園之意爲不誣矣
觀吾堂者邇太守仗旌節來故鄉得古人衣錦晝遊之美而
不知吾竊志榮幸之過朝夕自視思有以報吾君也登吾臺
者西見太行之下千山萬峯延亘南北爭竒角秀不可繪畫
朝嵐暮靄變態無窮俯視郭郭之中民閭官寺伽藍廡廩與
天花顏柳色紅綠交映燦然如指掌之上一無遺者而知太
守興此爲吾屬歲時休暇優逸之觀而不知吾亦自謂能勤
於作德然後處茲而休且逸也夫予始以武備不嚴不敢以
疾而忘治之所急而因得志其榮遇以及衆人之樂則是舉
也豈無益之爲哉故直書大槩并告來者夫郡縣之爲政有

期而更也政有所利非一人能保其久也前倡之後繼之推其心以公而相照則國家之事無不濟者况一園池之末哉豈之廢之必有能辨其心者時至和三年三月十五日記

案河朔訪古記彰德路總管府泊後花園曰康樂園昔宋至和中韓魏公以武康之節歸興鄉郡因開牙城作甲仗庫以脩不虞遂大脩亭池名曰康樂園取斯民共樂康時之故云魏公自爲記而刻諸畫錦堂上卽所謂相州新修園池記也元末似猶存故納新得知其概今覽公之自記開牙城而北之三分蔬園之地其一居新城之南其二居新城之北予以此求所謂新城蓋罕有知焉扼訪古記彰德路城已毀安坊有寺曰觀音禪院唐天禧二年所建寺

禮字訛當是市字 有八角井初州城在井北避洄水泛溢南徙乃包此井於城中是城既南徙故云新城矣然未著其徙自何歲鄴乘引宋志云後魏天興元年築宋景德三年增築是增築者爲新城或卽起於景德時舊志載城池建置殊疎畧予故於斯詳稽之

魏西門大夫廟記

存正書嘉祐二年九月立在豐樂鎮西門君祠

將仕郎守信安軍司理叅軍馬需撰

春秋已來列國相滅因其郭郭以爲郡縣縣之長曰宰曰尹曰大夫其實一也魏文侯時西門君之爲鄴大夫梓羣坐而投之漳以銷蠹弊之風鑿大渠而溉其田以緩饑瘡之苦斯

煜煜於傳記而籍籍於人口故太史公云西門豹爲鄴令名聞天下澤流後世无絕已時幾可謂非賢大夫哉夫澤流後世謂之賢大夫廟居血食於吾民雖千萬世不爲過歷載寢久傳賢益說今邑之西祠宇雖存而被其神以王公之袞冕且名其神曰豹神不惟呼之於人而又篆之於石鳴虔縣令春秋率僚佐以祈以報以酌以薦姑僕僕再拜於其庭訖不推本其神之名與廟之貌亦足以爲暗且慢矣惡觀所謂政事之舉耶嘉祐改元之秋九月予弟益長于茲邑二年矣祇報祭以伏祠下疚其號服之乖刺不合也趙命工新其神象易以古縣令之衣冠飾之剏其石篆之刻豹神者大榜其門曰西門大夫禁其土俗而告以新號予嘉予弟之有意於政

事而得遠暗慢之過也因爲詩以頌前人之仁正後人之失
云詩曰

老巫臺吏兮姦罔紛紛爲河伯娶兮賊吾良民殺生自任兮
賦斂無垠豪无完幣兮室無完人原陽岫岫兮濁河之濱曷
鹵沉斥兮磽确嶙峋種不菽粟兮莽爲荆榛歲常凶饑兮人
益口貧惟公之來兮謀度諏詢害期必去兮利期必遵姦巫
沉水兮大溝通津鄴俗俛首兮服公至仁祠叢土木兮時謹
祭倫歷載幾千兮不爲无文舛生積久兮弊緣因循口侈其
服兮名斥其神噫誰與正兮聖宋之臣棟宇雖舊兮號服惟
新時嘉祐丁酉二年秋七月晦日立石

登仕郎行相州鄴縣尉張誘

將仕郎守相州鄴縣主簿周明道

將仕郎試秘書省校書郎守相州鄴縣令馬益

案碑前列將仕郎守信安軍司理叅軍馬需撰中州金石

攷缺其名得此足以補之記稱西門君廟舊有篆石題曰

豹神而土人相沿名之其弟益長於茲邑嗣其石篆之刻

豹神者大榜其門曰西門大夫蓋新廟之事如是据河朔

訪古記云西門豹祠漳水之上有祠門扁曰西門大夫之

廟當卽馬君所榜至元時猶存然則馬君正名之功爲不

可沒已後列登仕郎相州鄴縣尉張誘將仕郎守相州鄴

縣主簿周明道將仕郎試秘書省校書郎守相州鄴縣令

馬益三人各此時鄴未併入臨漳及熙寧五年省廢而府

志職官於臨漳內不採輯有失博訪矣馬益守相州鄴縣
令据雲麓漫抄云今差京官曰知縣差選人曰令然馬益
結銜既稱試秘書省校書郎已不同選人而猶云守鄴縣
令當以令爲正官而校書郎爲其寄祿之資與

韓愷墓誌銘并序

存正書在韓魏公廟嘉祐七年十一月

叔祖開府儀同三司行刑部尙書同中書門下平章事昭
文館大學士監修國史上柱國儀國公琦撰并書

愷字和仲余姪殿中丞公彥之次子母仁壽縣君張氏愷天
性孝謹幼識禮義讀書彊記而善屬文嘉祐二年秋方應進
士舉而兄確物故是冬其父病愷躬進藥劑晝夜侍側不解

帶者累月及父之亡也哀毀過甚不能自抑既而感疾遂不可治五季四月二十二日卒時年二十噫愷之所稟可謂粹美矣使天稍畀以年則其治家也有不順而睦乎其得仕也有不忠而幹乎吾家之不幸而賦命之短也七季十一月二十九日因余妻安國夫人崔氏之塋乃於相州安陽縣新安村先塋東百步之近得地吉用丙穴塋愷銘曰
秀而不實夫子之嗟哀哉愷兮遽如是邪

授堂金石文字續跋誌載韓愷字和仲殿中丞公彥之次子嘉祐三年秋方應進士舉而兄確物故是冬其弟病愷躬進藥劑晝夜侍側不解帶者累月及父之亡也哀毀過甚不能自抑既而感疾遂不可治五年四月二十二日卒

時年二十前列叔祖開府儀同三司行刑部尙書同中書門下平章事昭文館大學士監修國史上柱國儀國公琦撰并書宋史魏公本傳三年六月拜同中書門下平章事六年閏八月遷昭文館大學士監修國史封儀國公悉與此誌結銜同而開府儀同三司行刑部尙書史不及之魏公書結體純法魯公然以勲業之隆掩其書名是故君子之所期不以小技累也

大宋故太中大夫行右諫議大夫上柱國南陽縣開國男食邑三百戶賜紫金魚袋贈開府儀同三司太師中書令兼尙書令魏國公韓公神道碑銘并序

存正書嘉祐八年十一月

推忠協謀同德守正佐理功臣樞密使特進檢校太師行
禮部尙書同中書門下平章事上柱國河南郡開國公食
邑六千八百戶食實封二千四百戶富弼撰

翰林學士兼侍讀學士朝散大夫尙書吏部郎中知制誥
充史館修撰判館事輕車都尉太原郡開國侯食邑一千
八百戶食實封二百戶賜紫金魚袋王珪書

丞相衛國公使以書來告曰我先人沒於大中祥符四年春
三月之甲申葬於慶歷五年春二月之巳酉雖論行有狀誌
墳有銘載於史有傳施之幽顯不爲無述然墓在吾里相州
安陽縣之新安村有窆棺之碑存諸隧公雅與我游又嘗陪
議軍國於二府知吾家爲詳宜爲我列先人事實刻於其上

以表於道燦然使後世觀之者曰此有宋賢臣之墓可信不
惑不待鉤考而後見則吾志畢矣予曰諾按春秋晉侯有子
食韓原其後遂以韓命氏六卿裂晉自主又有以韓國爲氏
者子孫散適諸郡國其在昌黎者最爲著姓公卽昌黎之裔
也達者歷世不絕遠祖徙居深州之博野四代祖曰又賓事
唐僖宗爲鎮冀深趙等州節度判官檢校太子左庶子兼御
史中丞時巢寇亂中原其帥王景崇檄諸鎮兵大破之謀皆
出於庶子庶子生二子其秀曰昌辭於公爲曾王父終於真
定府鼓城令鼓城生璆爲王父少自力學工爲歌詩與晉人
李崧徐台符深相善名重一時任廣晉府永濟令避亂又徙
居趙郡之贊皇台符爲作詩哀其不達而終其詩甚悲崧乃

以其弟之女妻其子構卽公之考妣也考始居於相以文章
稱尤妙書奏諸侯府爭辟之能致之者卽一府遂泊嘗宰貝
州之清河始至與民約曰屈法擾人等事吾斷腕不爲惟惡
利者爲君力之民於是大說然亦畏伏絲毫不敢犯歷事周
晉二代以世亂亦不得進入宋藝祖平南海徧選守臣乃命
知康州未幾以太子中允卒於官公漸顯累贈工部尙書有
子四人公於次爲第三諱國華字光弼幼而警絕鄉舉進士
太宗初一上中興國二年甲科授大理評事通判瀘州代還
遷右贊善大夫會詔與相帥擇賢佐改彰德軍節度判官凡
從宦者率以鄉里爲難主則斂鋒鏑一煦以恩公時年尙少
處之氣益動不爲少損有民李氏者口富殺人乃厚以賄州

之上下爲汨其情將不宜於死公持之盡挾其姦隱李卒弄
市由是諸豪憚之豐足不敢動公每出按轡儼然未嘗妄視
里人每置酒賭曰有見其左右顧者飲之至罷去竟不得飲
時國用方儉半倚關賦乃升秘書省著作郎監上蔡稅以監
察御史召彈擊有稜角巖然望高於台閣屬天子議復燕薊
揣庭臣曰安得勇而善辭令者爲我諭高麗出兵西攻契丹
以分其力則吾事可不勞而集旣曰非韓某不可卽假以太
常少卿爲使公馳舸至其國其王負固不時奉詔公坐館舍
遣王書責以慢命且稱朝廷威德之盛諸僭僞悉已擒滅遂
欲北取故疆以雪晉恥而委王以方面者其意不已重乎王
惟我中國是賴可以得志諸口雖暫勤而衆實王長世之利

也今若不勉天子怒一日大兵東出先誅不用命者如決海
灌燭火王其無悔王大恐奔走率職明日遣太相韓光元輔
趙抗領兵數萬度沮江以侵契丹且令光等率諸將詣館門
聽令公待以陪臣禮爲指畫方畧銜勒而慰遣之師期未集
公又累與王書獎激礪礪使不得少懈復問曰深入攻之邪
姑挑戰也王報曰已深入矣公得其肝膽遂復命天子大喜
拜右拾遺直史館而賜五品服章兼判登聞院入三司爲開
圻推官公論開口司王出納三部文籍置推官其名不正宜
更判事之號尋詔改主判三司開拆司遷左司諫充監鐵判
官久之契丹大將蕭寧遣使叩雄州約和州將劉福信之以
聞天子因思高麗功立命公走雄州按其事亦命代福作報

書索其情偽寧之意欲我先發公固願息兵以養民然念國
體不可屈書十餘反終不許復意其譎而有謀乃謝使者急
令脩邊還奏天子又大喜益愛其才故事凡曲燕五品以下
官非隸館閣者不預時燕侍臣於苑中公以在鹽鐵例罷史
局不得入侍天子特命直昭文館三司判官兼館職自公始
既又歷判鹽鐵度支戶部三勾院改左計司判官主計者嫌
其守正不肯下密譏於帝帝雅信公即日詔總判三勾賜三
品服章仍令宰相召於政事堂諭旨譏者大沮公圖報益自
奮條三司不便事二十七上之官民偕利後無以易者遂著
爲法俄出爲京東轉運副使卽拜峽路轉運使峽爲險遠一
路官俸薄不可責以廉公奏益之至今峽中官德公不已直

宗卽位入判大理寺自始登尙書秩至是凡五遷爲職方郎中出知河陽徙潞州會契丹由梁門入寇河朔分兵畧太行其鋒甚銳潞人恐公以精騎屯吳兒谷扼其奔衝賊遂不敢犯其境又率本道糧以餉朔軍王師大濟帝嘉之褒以璽書景德初契丹再寇澶淵驟請修好朝廷以其多變詐使絕域者難其人人亦憚其往故首命公假秘書監爲國信使江南饑又遣巡撫專一道之政還朝權開封府判官出知曹州拜太常少卿徙泉州天子封太山擢爲諫議大夫召歸道病卒於建陽驛泉人聞之傾一州來會哭久不忍去朝廷舉卹典賜一子官所以慰其放魂也公儀相魁碩有偉量與人接坦然必盡其誠不露形跡亦不敢機變尤篤於孝友常恨祿不

逮親居多感涕凡俸賜悉分惠宗黨不問疎密姑姊數人孀
且老皆迎歸奉之以終其身又爲外姻之貧者畢嫁娶復與
營其生事教子舍悉用經術而濟之以嚴法得任子不與奏
蓋欲使其自致也故諸子多能踐其世科公沒後布衣者尙
三人焉噫公年十九時已入官壽雖止五十五而其間從政
者幾四十年可謂久矣事兩朝不懈夙夜國家每有急難處
必首被選委又在計庭更八任不得解迹其從來不爲不遇
中外望歸謂必大用天子亦屢欲用之而公素方整守道權
倖者多不說故每爲其所間而止公惟所任莫不竭其力不
以抑壓自懣而遂浮沉於時向若得所用如人之所望者經
綸設施布宣光昭其爲功德非古賢執輿校之哉娶羅氏諫

議大夫延吉之女鄴王紹威之孫封宜城縣君六男球湖州
德清尉瑄將作監主簿琚司封員外郎兩浙轉運使琬河陽
司法叅軍璩秘書著作佐郎或自科舉或由蔭授方以才名
竝進而不幸繼亡琦相仁宗皇帝被遺制立今天子爲門下
侍郎兼兵部尙書同中書門下平章事昭文館大學士衛國
公望臨天下勲冠列辟以公積德儲慶所宜身享厚報然恨
早世不克待其發而發於丞相丞相以似以繼其傳之者又
可涯耶二女歸於衛尉卿高志寧丞相貴累贈公與祖尙書
曾祖永濟三代竝太師中書令兼尙書令又啟魏燕冀三國
皆追封爲公妣羅氏祖妣李氏曾妣史氏亦以魏燕齊三國
追封爲大夫人銘曰

士孰不官公官獨難使臨東夷跨海渺漫指麾出師勢分敵
患王始倔强恃遠且艱視詔抹刺不奉以虔公怒移書以詞
以調闢以禍福日星之觀王雖島酋聞義惕然發兵餽糧革
頑易慙對虜藉薩伏命館門能俾遠夷舉國奔職不憚已勞
不畏隣隙又俾強虜歛其毒螫二邦由公一舉斯得繼走朝
睡議收戈戢坐策立判虜姦不施不爲其欺國不挫威兩使
外禦天子再怡益之衆美大用是宜而卒不用讒人之爲復
不永年道卒遐裔與考同之勤官攸致位不都躬萃於幼嗣
曰將曰相勲德名世本支原流公得何異何以畀之天相其
類天實使然人亦靡然誌諸實然其昭昭然

嘉祐八年十一月十四日建

武寧章友直篆額

中書省主冊官王克明審億刊

中州金石記韓國華神道碑嘉祐八年十一月立富弼撰
王珪正書在安陽水冶鎮國華卽琦之父琦相仁宗乃立
此碑

授堂金石文字續跋碑前列推忠協謀同德守政佐理功
臣樞密使特進檢校太師行禮部尙書同中書門下平章
事上柱國河南郡開國公食邑六千八百戶食實封二千
四百戶富弼撰宋史宰輔表弼所授官與碑同本傳稱封
祁國公進封鄭又進封韓國公致仕其初封河南郡開國
公史不及之又列翰林學士兼侍讀學士朝散大夫尙書

吏部郎中知制誥充史館修撰判館事輕車都尉太原郡
開國侯食邑一千八百戶食實封二百戶賜紫金魚袋王
珪書本傳於珪散官勳爵亦從畧焉碑載國華歷官東都
事畧國華見韓忠獻傳但稱終右諫議大夫至宋史傳序
官始備亦不著其監上蔡稅又碑言爲京東轉運副使傳
作轉運使碑載徙峽路峽路之名見錢景謏傳安石欲令
治峽路役書且委以戎瀘蠻事蓋宋名川峽四路益州梓
州利州夔州也而傳以爲陝西路恐失其實碑後載公六
男球湖州德清尉瑄將作監主簿琚司封員外郎兩浙轉
運使琬河陽司法叅軍璩秘書省著作佐郎今丞相琦傳
失載球璩宜据碑補其闕

案碑後載國華娶羅氏諫議大夫延吉之女鄴王紹威之孫封宜城縣君据魏公爲大夫人胡氏墓誌云夫人父諱覺始仕孟氏名在朝籍乾德三年太祖平兩川例遣歸闕生夫人於京師久之不得調卒夫人從母李氏適故秦王牙吏王慶王被譴左右皆得罪家族無依遂以夫人歸於太師是胡氏爲諫議側室又生魏公於泉州亦當以附書然富公撰碑獨不稱者亦以嫡統之金石正例也若懶真子云國華嘗仕於蜀蜀中士人胡廣善相術與魏公所述名覺者異又胡覺既亡歸夫人於韓氏實不出自覺而懶真子傳聞之詞不足据依予故附此爲辨之以見野聞不可信如此後載武寧章友直篆額友直見二體石經周禮

殘碑有其名皇宋書錄章友直字伯益又引國朝會要云
嘉祐六年二月一日國子監言草澤章友直篆石經畢詔
補將作主簿友直自以不願仕進免官乃賜銀百兩蓋其
人辭榮守約不以藝自銜故得其所篆於此額尤爲可尙
篆額例與撰書人並列友直獨自居於後當以草澤自安
也

書錦堂記

存正書治平二年三月在韓魏公廟

仕宦而至將相富貴而歸故鄉此人情之所榮而今昔之所
同也口士方口時口阨閭里庸人孺子皆得易而侮之若季
子不禮於其嫠質臣見棄於其妻一口口口口口口口口前

騎卒擁後夾道之人相與駢肩累迹瞻望咨嗟而所謂庸夫
愚婦者奔走駭汗羞愧俯伏以自口口於車塵馬足之間而
莫敢仰視此一介之士得志當時而意氣之盛昔人比之衣
口口口者也惟大丞相魏國公則不然公相人也世有令德
爲時名卿自公少時已擢高科登顯仕海內之士聞下風而
望餘光者蓋亦有年矣所謂將相而富貴皆公所宜素有非
如窮阨之人僥倖得志於一時出於庸夫愚婦之意以驚駭
而夸耀之也然則高牙大纛不足爲公榮桓圭衮裳不足口
公貴惟德被口口而勅施社稷勒之金石播之聲詩以耀後
世而垂無窮口口口口口口口口公也豈止夸一時
榮一鄉哉公在至和中嘗以武康之節來治於相乃作畫錦

之堂於後圃既又刻詩於石以遺相人其言以快恩讐存名
譽爲可薄蓋不以昔人所夸者爲榮而以爲戒於此見公之
視富貴爲何如而其志豈易量哉故能出入將相勤勞王家
而夷險一節至於臨大事決大議垂紳正笏不動聲色而措
天下於泰山之安可謂社稷之臣矣其豐功盛烈所以銘於
鼎而被口口口乃邦家之光非閭里之榮也余雖不獲登公
之堂幸嘗竊誦公之詩樂公之口口成而喜爲天下道也口
是乎書

尙書吏部侍郎叅知政事歐陽修記

端明殿學士尙書禮部侍郎蔡襄書丹

尙書刑部郎中知制誥邵口題額

治平二年三月十三日太子賓客知相州趙良規立石

潯陽襄億刊字

廣川書跋蔡君謨抄得古人書法其書畫錦堂每字作一紙擇其不失法度者裁截布列連成碑形當時謂百衲本故宜勝人也

弇州山人慕魏公以上相作書錦堂於相州時歐陽文忠公以參政爲之記而蔡忠惠以三司使書之時稱三絕今觀忠惠書道勁偉麗出入清臣誠懸間而不無段師琵琶之萌然自宋書家僅以襄爲首云

容齋集蔡忠惠公書畫錦堂記每一字書數字擇其合作者存之各爲百衲碑

金石續錄朱蔡襄畫錦堂記畫錦堂在今彰德府鼓樓之西順治間掘地得是碑今移於城東南隅韓魏公祠余在京師曾見搨本端重嚴勁絕類魯公宋人稱爲本朝第一信不虛也彰德尚有醉白堂記韓魏公先塋碑惜未寓目潛研堂金石文跋尾右畫錦堂記文稱大丞相衛國公按韓忠獻於皇祐中封南陽郡開國公嘉祐中入相進封儀國公英宗嗣位改衛國公後又改魏國公碑立於治平二年三月猶稱衛國則魏國之封當在其後宰相表於治平元年閏五月已書魏國公者誤也此記俗本亦誤作魏蓋後人不知忠獻嘗封衛公而以意改之耳

中州金石記畫錦堂記治平二年三月立歐陽修撰蔡襄

正書邵口題額在彰德府治北此宋韓琦以丞相判鄉郡
建於居第者也琦第別有榮歸虛心二堂其後曾孫肖胄
守相又建榮事堂襄字方正爲一代絕手此碑尤名於時
容臺集稱爲每一字書數字擇其合作者存之名爲百衲
碑乃別體不乏寫功从刀衿从予學書者宜棄其短也錢
少詹云琦初封衛國晉封魏國歐陽作記時稱衛國是也
板本作魏國公誤甚矣當以碑爲正

授堂金石文宇續跋書錦堂記正書歐陽修撰蔡襄書治
平二年三月在安陽碑記韓公以武康之節來治於相乃
作書錦之堂於後圃宋史本傳拜武康軍節度使从之求
知相州東都事尋拜武康軍節度使知并州又知相州據

是碑但稱自武康來治並無知并州之文故本傳削是書也公出鎮凡三任鄉邦此初治相所建故記稱大丞相衛國公今集本有作魏者按傳載太后還政拜琦右僕射魏國公証之英宗紀治平元年五月戊申太后還政宰輔表於是年亦書閏五月戊辰琦自門下侍郎兼兵部尙書同平章昭文館大學士兼修國史魏國公加尙書右僕射然則碑立於治平二年猶稱衛公與史不合殆由記文之作在治平初及立石已越歲集本俗刻不足依也

案皇宋書錄學宮刻畫錦堂記相州元刻云書丹而此本問諸老先生云以墨跡撫於石今碑題蔡襄書丹正與書錄符及覽河朔訪古記云庭西畫錦堂記碑一通至元間

再摹而刻已非舊觀矣然碑仍稱書丹與相州元刻合蓋
當時必有舊拓本規度於石近時人多以忠惠之跡溢美
不容於口故爲揭其所自以昭真賞云

狎鷗亭詩

存韓魏公正書

亭壓東池復壞基園林須喜主人歸憩棠猶茂應存愛植柳
隄驚僅過園魚游藻間諳物性月沉波底發禪機羣鷗只在
輕舟畔知我無心自不飛

案安陽集此詩序於戊申卽熙寧元年也書勢雄逸獨出
規撫魯公而絕其迹皇宋書錄引書史云韓忠獻公好顏
書士俗皆學顏書其爲當時所傾慕已如此

李家場村修塔記

存正書熙寧元年三月在興陽寺塔上

熙寧元年三月十八日李家場村修塔第一級維那任應遂妻王氏孫見任晉州冀氏縣長官王槩妻弟王卿才妻呂氏母趙氏副維那蘇辛妻王氏賀用妻張氏同緣張海妻王氏蘇宣妻劉氏朱連妻褚氏魏進妻李氏李信妻王氏西良村孫顯妻張氏張保妻焦氏東桃村酒務高秘妻張氏呂家孫氏呂慶母孫氏陳元妻許氏牛凝妻栗氏景色村索政妻馬氏北採宗村劉準女王郎婦任庭遂年七十九歲長官王槩年三十四歲妻馬氏書字蘇辛鐫字人侯慶

案修塔記載東桃村酒務据宋史食貨志酒宋權酤之法

諸州城內皆置務釀酒縣鎮鄉間或許民釀而定其歲課
此記所載桃村蓋卽鄉間民釀之例與然酒務之設舊志
皆未述及殆其疎也已又此記李家場村西良村東桃村
景色村北採宗村証之鄴乘所引宋志皆不載是宋時村
名佚漏未悉收者多矣予備徵之以示方志所資在乎石
刻者尤可尙也

宋故秘書省校書郎韓恬墓誌銘

并序

序正書熙寧四年二月在水冶孝親寺

叔祖淮南節度使司徒兼侍中魏國公琦撰

恬字安之余姪殿中丞公彥之第三子母仁壽縣君張氏幼
僑邁喜學讀書強記而爲文辯速余嘗較公彥諸子謂恬宅

曰必能先取科第以才名自立嘗求補試國子監生程文中
等俄丁父憂未幾其仲兄愷與二妹繼亡恬與母張氏益大
悲駭不能自寧余遇嘉祐明堂恩亟先奏恬得秘書省校書
郎及爲娶職方郎中董之邵之女且以慰其母惻獨之心張
氏喜甚屢泣以誠恬令益自修飭以報恩鞠之厚已而張氏
復感疾議歸鄉里冀得移其故處而遂平愈八年春不幸疾
久卒不起恬旣併罹酷罰夙夜號蹕幾以殞絕猶能手疏母
之行實請余爲其墓銘終以哀毀之過其年十二月二十一
日亦卒時年二十二女二人長曰壽女次曰安女竝幼後恬
服除董氏以無男子歸其父家壽女者熙寧初元又不育鳴
呼禍暨之來未有如恬之一門相仍窮苦如是之甚者也悲

夫四年二月二十八日以其叔祖母安康郡太君之葬乃舉
恬之喪葬於相州安陽縣新安村先塋東其兄確之墓次葬
師所謂穴之外庚也銘曰

父母諸兄兮相繼亡於前二女之幼兮一復夭於後妻無以
守歸其家爾獨於茲瘞其極何罪而當此罰邪豈數之適相
偶邪天乎冥冥吾安以究

弟試秘書省校書郎跋書

案誌文見安陽集對勘皆同惟此石爲韓跋所書筆法宗
顏平原而運腕靈雋一化板重之習可謂善自規撫者矣

詩二首

存正書在韓魏公廟

淮南節缺侍中缺公韓琦缺

戊申再

安陽集作再題休逸臺

冰井梁摧幾

集作集作昔百秋移爲

柱立臺頭層

集作基面壘盤滑

散倒影侵

池

集作側集作拂檻

落霞凌綺席

集作入簷初月誤

環鈎芳林已

集作合集作陰

不成

見西山涌

集作萬邱

癸丑登休

集作逸臺

休逸臺高復凭欄

集作倭然風

月喜生顏城

集作頭

仰集作視親裁

柳天

外微分舊見山

集作草色

且無歸後怨禽

集作飛同到倦

時還欲知恩許

三來幸錦爛

集作輕裘

白晝閑

案前書魏公銜殘斷不完據神宗御制兩朝顧命定策元

勲碑治平四年正月庚戌被顧命拜司空兼侍中又辭兩

鎮不拜改淮南節度使此題並有淮南及侍中字與四年所拜官合至戊申題詩已當神宗熙寧元年矣後一詩題癸丑爲熙寧六年公三判相州詩也詩魏公手跡合刻一石當係癸丑刻之

畫錦堂詩石刻

佚

河朔訪古記畫錦新廟殿壁龕公書畫錦堂詩石刻一通詩曰重向高堂舉宴杯四年牽強北門迴故園風物都如舊多病襟懷遂一開白髮耻夸金駱騎綠影欣滿石梁塋因思前彥榮歸者未有三曾畫錦來

案今安陽集初會畫錦堂詩石梁作鐵梁蓋魏公移水井

臺鐵梁作休逸臺柱是鐵梁爲定本訪古記誤

安陽縣金石錄卷第六

偃師武虛谷先生著

安陽縣知縣鐵嶺貴 泰校梓

雙磴詩石刻

佚

鄴乘宋至和中忠獻韓公濬渠入城又於城西北隅傍壕
制爲水磴歲命酒官造麴幾千石以紓民勞建亭水濱作
詩刻石

案安陽集上巳會城北新磴詩次於至治乙未之後則此
詩上巳蓋丙申也是爲至和三年公治水磴起於此再葺
雙磴詩在癸丑是爲熙寧六年春日磴亭同會詩爲七年

甲寅鄴乘云建亭水濱作詩刻石皆不踰此三篇文敏時
猶及見之故以云然

兩朝顧命定策元勳之碑

佚

宋神宗皇帝御製

熙寧八年六月甲寅定策元勳之臣永興軍節度使守司徒
兼侍中魏國公判相州韓琦薨計來京師朕盡然追慟若不
勝詔輟視朝三日贈尚書令配享英宗廟庭七月癸酉成服
於苑中哭之慟又勅入內都知利州觀察使張茂則往護喪
事於是其孤中彥上公勳德之狀於有司已而集議尚書省
皆以謂謚公忠獻無易朕念既葬而墓陵之口未立嘗放大

雅熙民之詩雖美宣王之德而實大山甫之功肇其所生興其所施及乎進止威儀衣服車馬之盛莫不與民詠誦之以慰山甫之心可謂止矣蓋臣之致功者大則君之享福也降然則曷可無述今觀公之大節所以始所以終宜有金石之刻以著信於後世而錫訓於子孫非朕其誰爲之惟韓氏遠有世叙始武子事晉得封於韓遂以爲氏韓亡其子孫散之他國望出博陸推其族世名爵而譜猶存其三世葬安陽公安陽人字稚圭生而有異稟少好學夙智早成天聖五年公甫封擢進士甲科授將作監丞同判淄州召試學士院直集賢院再選太常丞監左藏庫厯開封府推官三司度支判官改左司諫時天異數見宰相以疾五日一奉朝請執政者德

輕不足與論天下事公連疏中書所行乖失久不報又請下御史臺集百官決是非於是同日詔罷執政者四人公爲諫官凡中外職有預責苟有所知者未嘗不言其啓迪上心則又每以明得失正紀綱親忠直遠邪佞爲急初王曾爲宰相謂公曰今言者太激無補上德如公言可謂切而不迂矣是時曾望方崇當時士人罕見獎與公得其言益以自信俄詔同丁度定雅樂公以阮逸胡瑗尺律之法出於私見皆詔罷之且請用王朴舊樂遷起居舍人拜制誥知審刑院益利歲大荒爲劍南三路安撫使活饑民自餘萬減冗役數百人奏除諸郡收市上供綳繡不急之物以便民趙元昊反以兵圍延州又爲陝西安撫使馳往撫邊至則賊引去矣方大將劉

平遇賊千百口以軍敗被執監軍黃和懼罪誣言上平實降
朝廷乃勅收其子命御史臺置獄於河中府公力爲陳之平
子旣蒙釋又得推恩及其家夏竦爲陝西經畧安撫招討使
公以樞密直學士副之公持攻守二策以決於上仁宗欲取
攻策執政者難之公曰元昊以區區數州之地其衆可知也
顧非舉國不能以內寇漢拘賊法城邑之守未嘗出境謀此
賊所以猖獗而屢勝也今彼志氣驕惰我儻併兵從一道出
糧充械利鼓行而前直無堅敵矣曷不用攻策公言雖懇激
然朝廷終以爲不可俄還涇原聞元昊遽求盟公曰無約而
謀和者謀也下令諸將日夜戒嚴方召兵瓦亭賊已寇山外
公指圖授任福曰此地有險可保彼雖衆不足畏也宜堅壁

待之無得輕出軍久則勢自歸且隨躡其後擊之可有功旣而又以檄戒福曰違節雖有功亦斬福庸將也卒爲致敵而死之夏竦使人收散兵得公所與檄於福衣帶間乃言失軍之罪不在公朝廷猶奪一官得知秦州數月復其官如故會分陝西爲四路改秦鳳經畧安撫使明年詔易陝西四帥皆爲觀察使如范仲淹龐籍二公亦辭公獨不辭曰上方憂邊甚臣子忍擇官乎口之復爲樞密直學士諫議大夫又爲陝西經畧安撫招討使公在邊久積養士氣日益振又欲用策取橫山以復河南故地會元昊求稱臣而未遂公與范仲淹素善天下稱韓范仁宗亦知此二人者遂同除樞密副使而相與復陳其策上前元昊口臣矣其謀卒不得用前此鄭戩

代公爲四路帥遣劉滬董士廉卽降羌所獻地築水洛城城役方作會戢罷涇原帥尹洙以爲非便止之滬等猶城不已洙乃械送於獄且將斬而戢力爭於朝公亦以爲水洛可罷而滬等犯令之罪不可貸朝廷命廷臣往視利害旣成而士廉等詣闕訟其事是時公同進用者已悉罷去公因自請補外詔以資政殿學士知揚州又徙鄆州徙成德軍分河北爲四路就移定州安撫使知定州更本殿大學士尙書禮部侍郎以觀文殿大學士留再任拜武昌軍節度河東經畧安撫使知并州契丹侵我天池公使口將蘇安靜諭之曰爾嘗求我脩池上神廟今曷見侵也虜不服安靜指外黃崑山之麓與之爲約不敢踰衍塞下多閑田先是國初潘美爲帥時敵

頻出寇鈔並邊之民甚苦之美乃令內徙空其田以爲禁地
公曰以虜日加侵苟失不耕是將遺虜也乃募弓箭手四千
戶墾田九千六百頃公數罹霜露之疾願上武康節罷邊東
還詔聽以節知相州且疾間授三司使工部尙書尋除樞密
使自國朝剗革僭暴所積機要文書皆散亂湮鬱不可考究
諸房比例前後檢用未嘗同吏每採高下以市賂乃命官條
悉刪留而論次之姦緣以止其得祖宗御筆所裁則悉上秘
府以爲世主憲總千餘秩後至中書亦行之以本官同平章
事進刑部尙書昭文館大學士監修國史封儀國公仁宗方
倚左右口臣以經畧太平之口公因得選敕群司百吏使奉
法循理各安其職而天下晏然無事百姓遂安刑罰衰止衣

食滋殖守成之業茂矣仁宗在位四十二年皇嗣未立而天下其以爲憂大臣顧避退縮莫敢爲上言公乘閒進曰皇嗣者天下安危之所係自古禍亂之起由策不早定也今陛下春秋高未有建立何不擇宗室之賢者而定之以爲宗廟社稷之計乎他日又進而言曰昔漢成帝在位二十五年議立孝元帝祿定陶王爲子成帝在漢非高才主且能之以陛下之聰明睿智奈何久不決也始以英宗判宗正寺英宗稱疾辭未受命仁宗以問公公曰名分之未定去就之所難也臣切憂之帝悟遂詔立皇子公復稽首曰事定矣臣復何憂時詔雖下英宗辭益堅仁宗欣然用其策英宗旣爲皇子遂入居於慶寧宮嘉祐八年三月壬申以仁宗顧命奉皇子卽皇

帝位於時天氣溫晏宮廷內外罔不肅然自畿中市井猶有
未知者口門下侍郎兼兵部尙書平章事進封衛國公爲仁
宗山陵使初英宗暴得疾皇太后垂簾權聽軍國事及皇躬
康復公乃請乘輿素仗出祈雨都人猶未識新天子至是瞻
仰天日之表乃相與言君貌類祖宗真英主也皇太后聞之
喜卽下令還政進左僕射兼樞密院事提舉修仁宗實錄昭
陵復土上大丞相印綬英宗親製手詔賜之語其眷公乃起
不敢辭辭兼樞密院事許之其年南郊大禮進封魏國公以
陝西戍兵多軍常不足欲藉下民爲義勇方議上諫官司馬
光言公曰往者嘗籍之爲民兵遂涅之爲官軍父母妻子莫
不環顧以泣也臣願以一身救數萬之命英宗曰河北河東

亦有義勇何陝西爲不可公於是督使者疾馳往籍之得十
四萬人光猶上前論其事英宗曰已籍之矣何獨未知也夏
賊寇大順城公卽欲停歲賜絕和以問罪於其主諒祚大臣
或有以保元康定之間四方用兵王師傷敗之事諫於上前
陰撓其謀者公曰此但膠往迹何不較今日彼我乎且諒祚
狂童非有元昊智計而朝廷邊備乃大過昔日誠詰之心必
服時衆雖屈公然心不善之也英宗旣用公策遂遣使齎詔
往問衆而諒祚懼以表謝於朝廷會英宗已寢疾輔臣入起
居於便殿公叩榻問諒祚所上表云何英宗曰亦如前日所
料耳於是向之異議者媿服公之謀且善英宗之聽也未幾
卽卧內承詔以朕爲皇太子治平四年正月庚戌被顧命奉

朕卽皇帝位拜司空兼侍中爲英宗山陵使既還又引故事
願罷相不聽固請乃以鎮安武勝軍節度使兼侍中判相州
仍虛上宰位待之賜興道坊第一區公因以國朝故事領兩
鎮者未嘗有辭不拜改淮南節度使种諤取綏州宥州貢不
至旣勅備於陝西又改陝西經畧安撫使判永興軍或以綏
州孤遠難於饋餉請弃與賊者朝廷信之命公廢焉公以謂
其城阨賊衝橫據山界并視不平不可毀留詔抗議以便宜
檄邊固守之乃得存迄今爲延州東北形勢之障公旣常有
滅賊志因是乃大揭榜塞上具陳向背禍福招來橫山之羌
爲進討之計會關中頻歲不登邊廩無餘粟朝廷雖多公策
而時不相之故其功卒不就河北衍地數震又改河北安撫

使判太名府兼北京留守公名動外寇每漢使至契丹必問
公安否熙寧初公子忠彥使金燕於戎帳其主顧問其常使
漢者曰忠彥之兒肖其父乎曰然遽命工圖之而去故例金
使過北都與留守通書皆不名明年來賀同天節副使成堯
錫謂接伴曰今以韓丞相故特書名後人雖欲其名而不得
也以永興軍節度留再任公雖留辭所加命復判相州居二
年乃言臣老矣恐不足任事願乞骸骨以歸慎以向所加口
授之公雖在外口常口口以口口口選口口口形殆非復在
執政曰朕方念公深遂不能起可口慟哉公天資忠孝巍然
如山立至論大事決大疑而辭氣雍容不見其有憂喜之容
也方天下以爲憂公獨能蹈危機進沉斷上以尊強宗廟社

稷下以慰安元元之心功高而不矜位大而不驕祿富而不侈自宋興以來功臣未能遠過也公爲宰相十年蓋進人多矣然未嘗以官職私所親例得恩澤先推與其旁支逮朝廷錄遺其子猶有未命者公薨前夕有大星殞於廡中櫪馬皆鳴其年十一月庚申發兩河卒以一品鹵簿葬公相州安陽縣豐安村之原享年六十八歲曾祖瑒廣晉府永濟縣令祖構太子中允父國華諫議大夫皆贈太師中書令兼尙書追封齊燕魏三國公男六人忠彥太常丞直龍圖閣端彥右贊善大夫純彥粹彥嘉彥皆大理評事其一人蚤卒孫男六人維公奉詔立皇子爲皇太子被顧命立英宗爲皇帝立朕以承祖宗之緒可謂定策之元勲之臣矣或以公安社稷口周

執政事比姚崇其言不幾乎朕旣述公以文遂築其首曰萬
朝顧命定策元勲之碑夫豈特慰公之知亦將爲天下臣子
之勸銘曰

嶽祗嶭峨默降靈氣匪申匪甫而相予治赤精傳圖繼生仁
宗誰適作相有來魏公烈文魏公匪卜于枚天實賚予魏公
有來公治萬事靡猷不經進退賞罰惟時權衡晦明風雨罔
拂厥序男女潔誠以田以繷萬物瑤瑤四塞舞歌雖本帝力
公陳亦多皇有大器誰嗣誰尸公陳與予天命不迷功成辭
隆視天盈虛旂常之載勤勞終初乘彼路車袞衣赤舄其誰
公如將相出入公行不歸公死是悼口口公儀淚落苑草永
懷英宗公則配食我徂于宮孝思罔極潔粢碩牲鐘鼓管絃

公從享之何千萬年

案碑載公天聖五年公甫冠擢進士甲科授將作監丞同判緇州同判卽通判避章獻太后父諱齊東野語本朝章獻太后父諱通嘗改通直郎爲同直郎通州爲崇州通判爲同判通進司爲承進司通奉爲中奉通事舍人爲宣事舍人至明道間遂復舊此碑當神宗熙寧八年猶稱同判蓋緣公初授官在天聖五年正其避諱之時故碑亦因仍不易又云分河北四路就移定州爲安撫使文獻通攷慶厯八年詔置河北四路安撫以韓琦王拱辰賈昌朝等充諸路使四路謂魏瀛鎮定四州碑不書其年以此互証之知定州安撫始以公爲之矣碑云爲英宗山陵使旣還又

引故事願罷相不聽固請乃以鎮安武勝軍節度使兼侍
中判相州此亦見齊東野語四載以永厚陵成復護葬於
洛陽因上疏云自唐至於五代故事山陵使事迄今行求
去遂以司徒兩鎮節鉞判相州所謂故事者卽指此

宋故推忠宣德崇仁保順守正協恭贊治純誠亮節任運翊
戴功臣永興軍節度管內觀察處置等使開封儀同三司守
司徒檢校太師兼侍中行京兆尹判相州軍州事□□□□
□□使上柱國魏國公食邑一萬六千八百戶食實封六千
五百戶贈尙書令謚忠獻配享英宗廟廷韓公墓誌銘并序
存正書

龍圖閣直學士朝散大夫尙書右司郎中提舉西京嵩山

崇福官上輕車都尉潁川郡開國侯食邑一千戶食實封二百戶賜紫金魚袋陳薦撰

朝散大夫□□□□□集賢院學士史館修撰宗正寺修玉牒官權判尚書都省判秘閣提舉醴泉□公事上護軍常山郡開國侯食邑一千五百戶賜紫金魚袋宋敏求書

河東節度使開府儀同三司守司徒檢校大師兼侍中行太□□□大名府兼北京留守司事充大名府路安撫使兼大名府路駐泊馬步軍都總管上柱國潞國公文彥博篆蓋

熙寧八年六月二十四日永興軍節度使守司徒兼侍中行

京兆尹判相州軍州事魏國韓公薨于正寢享年六十八上
聞震悼甚罷三日視朝贈尙書令詔配享英□□□臨後苑
發哀音過常數遣使弔問其孤賻物加等又令其家欲有所
請而在著例外者一一條上後皆從之親族拜官者十人以
其兄子正彥知相州命太常丞集賢校理李清臣祭以中牢
遣入內都知利州觀察使張茂則監護葬事又遣勾當龍圖
天章寶文閣入內供奉官張懷德增修墓兆斲石以爲幽堂
其費皆給於官有司考行謚曰忠獻以□□□□月二日塋
於相州安陽縣豐安村祖塋之西北厯觀前世天子于勲舊
大臣飭終恩禮未嘗有如此之厚也自公之薨不間遠近少
壯耆艾聞之者罔不失聲咨嗟涕泣相弔儻非有利澤嘗濟

於天下仁厚忠恕之德感人之深孰能至於是乎前塋其孤
以公之功實善行之錄具書來授請銘公墓窮惟公之勲業
名德載之鐘鼎書之功錄傳之四海內外□□□□□□雲
之音常在人觀聽則垂之百世而益彰又何必資淺陋朽拙
者之言然後傳信然壙必有銘薦公之故吏也義不敢以衰
病不能辭謹考次始終大節以書韓本出姬姓至厥爲晉正
卿諡曰獻其後子孫散居他土傳陸之韓蓋其後也五世祖
父賓而上皆莖博陸父賓仕唐爲成德軍節度判官檢校左
庶子以博學富文辭聞於時高祖昌辭爲鼓□□□□□□
□璆爲廣晉府永濟令累贈太師中書令兼尙書令齊國公
夫人史氏追封齊國太夫人祖構仕本朝爲太子中允累贈

太師中書令兼尙書令燕國公夫人李氏追封燕國太夫人
父國華終右諫議大夫爲世名臣國史有傳累贈太師中書
令兼尙書令魏國公夫人羅氏追封魏國太夫人所生母胡
氏追封秦國太夫人皆葬安陽公遂爲安陽□□□□□
走少敏悟過人不煩師教而強學自立謹重修潔未嘗爲出
防表孀縱事始冠天聖五年登進士甲第授將作監丞通判
淄州踰年遭秦國憂居喪以孝聞服除遷太子中允明道初
召試學士院遷大常丞直集賢院監左藏庫爲開封府推官
賜五品服改度支判官遷太常博士景祐五年拜右司諫供
職始對諷仁宗明得失正紀綱近忠良□□□□□□久
疾廢朝謁而日至中書視事復同列議論不一事多留積又

內降數出公連抗疏極論仁宗爲罷中書執政內降而止詔
叅議雅樂而阮逸輩忝尺之法無所考據奏罷之公爲諫官
三年時政之闕知無不言言無不盡前後七十餘疏天子以
爲忠故多嘉納五年與三司同定茶法又裁省國用轉起居
舍人知諫院寶元二年拜知制誥□□□□□□品服益利
路饑爲體量安撫使活兩路饑人一百九十餘萬培尅之害
一切蠲去蜀人懷之還朝屬趙元昊初叛遣將失律仁宗自
選公爲陝西安撫使北馳至高奴而賊已引去將士皆傷夷
之餘垂頭喪氣居人惴惴未寧公乃籍戰死之家厚加賻恤
又列其當贈錄者聞於朝更選材武之士以張兵勢修嚴戰
守之備以固邊圉人情□□□□□□敢將死猶叱賊而

小人誣其降遣御史置獄以按之公力爲辯其冤平由是始得褒贈家亦被恩使還康定元年遷樞密直學士爲陝西經畧安撫副使同管勾都總管司公事明年春按部至涇原聞元昊遣使乞和公戒諸將曰此兵法所謂無約而請和者謀也正欲歛我而來犯塞耳宜益嚴其備方會兵瓦亭而賊已寇山外公疾馳至鎮省軍指□□□總□任福曰賊必由此路往來此地得形勝可處高而陣以壯兵勢賊遠來利在速戰必不能久留當整衆持重以挫其銳待其歸則擊之未歸勿得輒擊旣行公又以其檄戒福曰違節度有功亦斬福愚勇始見賊殊不遵節度屢貪小利驅衆以深逐不知其誘也遂戰歿大帥夏文莊公遣人收兵得公所與檄於福衣帶以

聞安撫使王文安公亦以是言□□□罪在裨將止下遷公
石司諫仍舊職知秦州數月遷舊官俄進尙書禮部郎中兼
秦隴鳳翔階成州路駐泊馬步軍都總管兼經畧安撫沿邊
招討等使慶歷二年改秦州觀察使秦之城素狹隘民居兵
營半在城外公奏築東西二城以環之一物不取於民十月
復爲樞密直學士遷右諫議大夫十一月充陝西四路沿邊
都總管經畧安撫招討等使駐涇□□□師所遣戍兵類多
孱軟而土兵勁律耐勞苦公乃奏增置土兵而稍減屯戍公
護邊久恩信周洽士賈餘勇與范文正公志同氣合一歸於
忠義乃其謀出師取橫山恢復河南舊地會元昊乞稱臣遂
未發仁宗知公勤勞甚久嘗賜密詔先諭以初往之意明年

與范公同召拜樞密副使五上表乞守邊不從既至與范公
復陳取橫山之策而元昊已□□□止□雖納款猶敢妄有
邀求欲自建元爲父子呼吳祖使人與陪臣爲列二府緣此
欲議其輕者徂之公獨曰此皆非人臣禮不可許後遂殺其
禮爲夏國主云仁宗方勵精庶政手詔中書曰朕用韓琦范
仲淹富弼皆中外人望其言之可行者宜以時條奏又開天
章閣賜坐咨訪當世急務公上十數事其畧脩西北選將帥
明按察豐財利抑僥倖進□□□才去冗食慎入官言未
及大施而不便於已者毀已興矣富鄭公宣撫河北還將至
國門而命守鄆公奏曰弼忠亮少與今天下不聞其過使還
咫尺不得一望清範少陳策畫而責補閑州臣竊爲陛下惜

之不報前此鄭文肅公領四路以劉滬董士廉城水洛涇原
帥尹洙言非便詔止之俄鄭公罷四路而猶移文二人者城
之洙乃遣總管狄青□□□□□士廉係獄青欲斬之
而洙不許鄭公極語論救於朝公乃上十事以數二人者之
罪然卒薄滬等責後士廉請闕訟其事而執政左右之復城
水洛時同進數公皆已相繼罷去公亦懇求補郡五年除資
政殿學士知揚州遷給事中徙鄆州又改成德軍八年河朔
始分四路移定州路都總管兼安撫使兼知定州從來守將
皆武人安於無事□□□□益驕縱公至修明軍政剷除
宿弊士卒犯令或稍涉暴橫則立斬以徇連營惕息皆怙怙
以就律至不敢大聲高語考李衛公遺法爲方圓銳三陣以

教之軍聲烈烈震懾虜廷楊懷敏建言禁並塞山林公私不
得樵採居人亡去者十六七公奏開其禁會大水歲饑夙夜
竭力以修荒政豫儲菽粟設區處以待流徙之民遠近歸之
者如市至春獲給路□□□舊業全活者不可勝數優詔褒
美皇祐元年拜資政殿大學士遷尙書禮部侍郎又拜觀文
殿學士再任五年授武康軍節度使充河東路經畧安撫使
兵馬都總管兼知并州北虜謀侵我天池之境公遣將蕭安
靜至塞上召虜人諭之曰爾昔嘗借我天池廟焚香文移且
在今何得妄言爾地虜人屈伏遂并退連冷泉村地十餘里
又代北舊以黃嵬□□□界自後戎人輒耕上山腹公又遣
安靜穿濠以杜其侵越遂復舊境並北塞多閑田而甚美太

宗朝潘美爲帥患虜之鈔掠驅其民內徙而空之謂之禁地
昔歐陽公嘗奏乞耕之而不果公曰我今不耕異時必爲虜
人盜占遂募人爲弓箭手計頃分給總得四千人墾地九
千六百頃先是歲遣將統內郡兵公戍近羗諸郡謂之防秋
公曰河外無事□□□時坐耗邊廩非策也乃不遣大原之
俗死者多燔而後葬貧人無地則收骨寄之佛祠中公知惻
然乃下令開諭自今毋得燔又爲近郊買地四隅立表貧無
地者得葬於其中自是其俗一變會久疾乞還節守鄉郡詔
領節知相州并人環擁號泣者萬計盡曰不得出郭門至有
毀橋新路隨行數驛然後還者踰年召爲工部尙書三司使
在道除樞密□□□以來石府圖籍紛亂叢委而未嘗紀次

每討舊文以證近事不可遽得乃奏選官編集爲六百八十
卷其間得祖宗神謀睿斷載之御筆可以爲後世法者尤多
其後中書亦如之又奏定祿令驛令請出內帑錢糴粟數百
萬以實塞下豐州古九原也與麟府鼎足向以無水不能守
爲叛羌所破公奏遣郝質郭靄王慶民經度修復之又置保
寧永安二寨□□之屏蔽嘉祐三年六月拜同中書門下平
章事集賢殿大學士六年進拜刑部尙書同中書門下平章
事昭文館大學士時仁宗延禮輔臣圖講太平之治祫享祀
明堂赦書下仁惠周於海內憂賦役之耗民力而遣寬裕之
使慮俊良之伏田野而有遺逸之賢欲守令之修職業增秩
久任以勸之矜茶禁之害齊民除權法以蘇之籍戶絕田租

置廣惠□□□天下之窮獨募印方書給散藥劑以救天下之疾恙其始議多自公發七年進封儀國公仁宗春秋高尙未有皇嗣雖忠鯁之臣間有言者而未開納公朝夕深念自以身都上相之位國之大計無大於此者乃進言曰陛下承三聖之統兢兢翼翼日思光大先烈今享御四十餘年虐主器之位恐非所以重宗廟之意也臣竊深憂之願□□宗室之賢建爲冢嗣副萬國渠渠之望仁宗意猶未決公乘間又數開白言益切至仁宗曰後宮將有就館者卿姑待之後免乳皆皇女公金石一心挺然無所顧恤一日又懷孔光傳以上陳於展前曰漢成帝卽位二十五年無繼嗣遂立帝弟之子定陶王成帝中材之主猶能之況陛下聰明仁聖並迹堯

舜又何難哉願陛下以太口之心爲心則無不可者仁宗釋然感悟俄選英宗判宗正寺而力辭不就職日堅一日公復啟之曰陛下既知其賢而選之矣今過自謙抑不敢遽當者其器大識遠非中智之所能跂及此益所以爲賢也願陛下固起之仁宗曰休更爲他名目便可立爲皇子於明堂大禮前成之公進曰此天地祖宗神靈扶佑以開陛下口意社稷幸甚天下幸甚今獨中書聞德音而樞密院未知臣愚願陛下復宣諭及右府諸公對仁宗宣示一如前語公奏曰茲事體大願降詔中書門下從之中外傳聞交語相慶英宗已立爲皇子猶冲退未離藩邸公又奏曰今旣命之爲子雖已令本宮族屬敦勸願更選親信內人往諭陛下之誠則必出矣

仁宗遽用公言□□廟遂入居於慶寧宮八年三月受仁宗遺制奉英宗卽皇帝位中外祇肅晏然無一事四月克仁宗皇帝山陵使是月拜門下侍郎兼兵部尙書進封衛國公英宗初卽位感疾慈壽宮以權宜預政公以純誠一節承事兩宮忠謀碩望鎮厭內外人情安帖上下無異言公審英宗已康復乃力請朔日御朝臨幸禱雨奠宗室之口以開慰衆心及具素仗出都人瞻望聖顏皆躍躍以喜其耆舊相與言曰吾君兒類祖宗眞英主也車駕還宮起居安適一如平日慈壽宮甚悅未幾遂還政治平元年提舉修仁宗實錄閏五月進右僕射兼門下侍郎權樞密院公事英宗聽斷之始未能周知羣臣能否公乃籍從官等名氏爲一編各題品其才業之

實二用之宜以進永昭陵使畢懇辭時柄英宗手詔曰卿有大德於朕有大功於時一旦無名謝事而去豈不駭天下之耳目而重朕之過乎其輔朕使無忝先帝之命則卿之終惠也公見詔語峻甚不敢復辭郊祀恩進封魏國公辭兼樞密院公事從其請國朝舊制天子初卽位宗室尊行之已亡者當贈官改封濮安懿王英宗所生父也口書以本朝未有故事請付有司考典禮以求其當旣而禮官與兩制共議咸謂當封大國稱皇伯中書以所生父稱伯疑無經據方下三省再議而英宗遽令權止而臺臣交攻不已指歐陽公爲主議者詆毀尤切公謂人曰此中書事皆嘗所共議何得獨指歐陽公乎識者嘆其寬恕而篤於義臨人之謗惠然肯與分之

公以陝西封域遼濶而兵常若口口乃乞如河東河北之制籍鄉民爲義勇以助兵勢言者深以爲不可而公議適與英宗意合卒行之夏賊寇大順城公言宜停其歲賜遣使齎詔問罪以全國體而大臣議未定或以寶元康定之役爲言公曰兵家湏料彼此於今我之兵勢大盛於前日諒祚乃一狂童何得擬元昊若問之必服其罪卒遣何次公持詔以往次公還以諒祚表進屬口宗已口疾二府同入問聖躬畢公奏曰諒祚表何言英宗顧曰一如所料一如所料治平三年十一月公親奉英宗手詔立今天子爲皇太子明年正月首被英宗顧命奉今天子踐祚是月又英宗皇帝山陵使拜守司空兼侍中御史中丞王陶公素所竒待一旦以所用非其所

望深疑公有不悅意乃奏彈宰相不押常朝班執口口口垂拱殿起居畢升殿奏事退早則宰相又赴文德殿廷押常朝班或辰漏將盡以久留百官且逼還政府治事則宰相更不赴止御史臺放班循入例也既而又奏疏肆言誣毀且率諫官同對上得其情遽罷其臺職公亦懇求補郡上遣張茂則賜手詔慰免促令視事使永厚陵還復固以疾辭位除鎮安武勝等軍節度使守司徒兼侍中口口州口口師賜第一區擢其子忠彥試帖職授三子官公以領兩鎮本朝宰相去位未嘗有懇辭改淮南節度使未行會种諤謗羌酋嵬名山一族嚮化以兵取綏州疆場騷然改陝西都總管經畧安撫使判永興軍公義不辭難承命卽行時議者多以綏州孤絕難

守棄之便上遣使促棄之公奏曰綏州地形險要已與師得之矣安可復棄示弱於賊□□□□□世崑名山守之後卒留爲綏德城又城噴珠堡據筆簾川起甘谷城卽葉變會爲天雄柵皆控扼衝要以塞邊隙屬羌得無侵軼之虞公知虜中荐饑種落凋困可以利害動乃爲牒大書開諭禍福揭于境上以招橫山之衆而與廟堂之意異遂復乞守相州至相未盡三月會其年河決地大震民饑流亡滿道上先遣中貴人喻意仍賜手詔遂□□□□安□使判大名府又諭中書令協濟其經畫公體天子仁惻之意殫精畢慮講衆術以賑恤之由是饑羸者得沾實惠轉徙之民而多還本業時青苗法初下公奏曰愚民請之則甚易納之則甚難或遇荐饑

民無以輸必恐本錢亦喪矣願罷之復常平舊法俄條例
司疏駁以爲非是公又建明言愈切直事雖不就世亦稱其
忠固乞守徐州不許□□□月收□興軍節度使京兆尹
昭不受虜使每至魏境必先誡其下曰韓侍中在此毋得過
有酒索虜使與京尹書故事其尾止押字至是以公故悉書
名六年復判相州公雖在外上嘗有所咨訪自以三朝老臣
志在竭忠報國乃極陳時事之所以得所以失生民之所以
休所以戚無毫銖回隱務以補助聖政比及二年前後十餘
章告老上□□優□終不得謝改永興軍節度使再任公益
懇辭使者持詔答未至而公已以疾不起矣將薨之前夕大
星殞於晝錦堂之後櫪馬皆驚樓上掌漏者見之疑以爲火

也公明誠內融德量宏博物之至小大無所不容然隱察其私則短長輕重如寸量銖較皆不失其本真猶黑白之不可亂也臨大事審義之得忘身忘家誠意堅定如山岳之不可移而容□□□□微之難見於辭氣及其成就大功則又退然不自爲有降接布衣小官忘去貴重溫言款語以盡其情故人人退而各過其初望待君子小人一以誠或不以誠應亦不之責也引拔天下賢俊不問識與不識多至顯仕而未嘗語於人臨決劇務雖千品百目分安于前而精爽益明儀狀英偉人望之如衆山之中見嵩岱氣象雄重奇拔莫可倫擬自奉菲薄□□□好施士之窮寒露者無虛日及其去無不各充其欲親戚之貧乏無託仰公然後衣食者常十數

家一門百口而資用均一無疎近之間嫁中外孤女十餘人
教育諸姪同口已子所得恩例嘗先及旁支述其終子猶有
未官家亦無留資少善尹師魯及其亡也分俸以濟其家又
爲言于朝官其一子所至皆有遺愛人多畫像以慰其思魏
人懷德之深口口口祠爲塑像以事之以比狄梁公聞公之
薨聚哭奠祭于祀下者旬浹不止遼人尤畏重之凡使至其
國必問韓侍中安否今何在其子忠彥嘗使虜中方晏其主
問左右曰孰口口南朝識韓侍中忠彥貌類父否或對曰類
命畫工圖之天資簡素無多玩好惟聚書萬餘卷多手自刊
校雖老且病未嘗一日廢書不觀其爲文章雄健明粹有法
而尙理始好口口口公書至晚年筆勢老勁自名一家奉先

堊未嘗計所費自四世祖至八世墳兆皆訪得之增廣其地
培植松楸起屋於其傍募人守視嘗謂子孫曰窮達固有命
吾入朝殆將四口孤直自信未嘗枉道求合於權要以沽進
而獨人主知之出入將相二十餘年遂至三公其所恃者忠
信與天道而已矣汝曹宜觀吾平生之所爲無喪所守以墜
吾教自號□□□叟有安陽集類五十卷二府忠議五卷諫
垣存藁三卷陝西奏議五十卷河北奏議三十卷雜集奏議
三十卷千慮集三卷古今參用家祭儀一卷安陽舊文十卷
手編家集六十卷娶尚書工部侍郎崔公立之女追封魏國
夫人柔嘉慈順治內事有法度先公而亡公之妻祔焉大男
子曰忠彥秘書丞秘閣校理次端彥大理寺丞次良彥秘書

省校書郎早卒□□粹彥並大理評事次嘉彥尚幼五女
子長不育次適大理寺丞王景修次二人不育次在室孫六
人曰治大理評事曰濺太常寺大祝曰澡曰洽曰浩曰澄並
幼銘曰

惟天佑聖賢出輔時丕丕魏公相我盛朝君臣一德上堯下
夔內如之何百度清夷外如之何萬里天威羣材任職物物
遂宜極天蟠地太平之基開贊仁宗選賢主器帝矚英皇曰
爲予□□廟以重萬靈以喜聖聖繼明延光億世皇室大勲
莫之與二人視之艱公履之易俄膺顧託今上御天忠斯勤
斯侯肅侯虔防滿避位高風凜然存全德歿有殊澤中臺
之長官儀之極英廟崇崇享延配食名俱天壤迹留金石太

行之東漳水之側萬古是瞻魏公貞宅

案魏公墓誌明人重刻附置於廟其文爲陳薦撰宋敏求書文彥博篆蓋三人並見宋史薦所書魏公行跡號爲詳瞻史多依之惟傳載尹洙劉滬爭水洛事琦右洙朝論不謂然其語大涉略証以此誌鄭文肅公領四路以劉滬董士廉城水洛涇原帥尹洙言非便詔止之俄鄭公罷四路而猶移文二人者城之洙乃遣總管狄青

缺七字

士廉係獄

青欲斬之而洙不許鄭公極語論救於朝公乃上十事以救二人者之罪然卒薄滬等責後士廉詣闕訟其事而執政左右之復城水洛据王鈺默記載董士廉佐劉滬同擅築水洛城尹師魯大非之其後狄青帥渭希師幹意以滬

擅興械送嶽

云

其後反訟師魯賊罪師魯貶死而士廉從

輕比卽誌所云士廉詣闕訟其事也誌又載公兼知定州

修明軍政剷除宿弊士卒犯令或稍涉暴橫則立斬以徇

此事亦見默記狄青舊部曲焦用過定州青留用飲酒而

卒徒因訢請給不整魏公命擒焦用欲誅之青聞而趨就

客次救之魏公不召

云

立青而面誅之蓋公整率驕兵頑

卒事每立斷如此至誌載公懇求補郡上遣張茂則賜手

詔慰勉促令視默記云神宗遣瑄張茂則傳宣撫問韓公

公待以舊例常禮此尤足以彰大臣立朝之節可爲後世

昵比左右近侍者戒矣二事非魏公勲業所最然取以証

誌文之實有依据非徒爲諛墓詞也

北京韓魏公祠堂記

存正書元豐六年七月在縣治韓魏公廟

沒而祠之禮也由漢以來牧守有惠政於民者民或爲之生祠雖非先王之制皆發於人心之去思亦不可廢也然年時浸遠人浸忘之惟唐狄梁公爲魏州刺史屬契丹寇河北梁公省徹戰守之備撫綏凋弊之民民安而虜自退魏人祠之至今血食熙寧初河北水溢地大震官寺民居蕩覆者大半詔以淮南節度使司徒兼侍中韓魏公爲河北安撫使判大名府兼北京留守公旣至愛民如愛子治民如治家去其疾忘已之疾口其口忘已之口口口口者以安流者以還饑者以充乏者以足羣心旣和歲則屢豐在魏五年徙判相州魏

人涕泣遮止數日乃得去魏人□□而不得見□與立祠於
熙寧□□塑□像而事之後二年公薨於相州魏人聞之爭
奔走哭祠下雲合而雷動連日乃稍息自是□□□生及□
世之日皆來致祠及作佛事未嘗少懈噫公之德及一方功
施一時者魏人固知之矣至於德及海內功施後世□□□
□之乎公□□相十年□仁宗之末英宗之初朝廷多故公
臨大節處危疑苟利國家知□不爲若湍水□□□無所
□□□諫曰公所爲如是誠善萬一蹉跌豈惟身不自保恐
家無處所殆非明哲之所尙也公嘆曰此何言也凡爲□□
□盡心力以事君死生以之顧事之是非何如耳至於成敗
天也豈可豫憂其不成遂輟不爲哉聞者愧服其忠□如此

故□□三后大濟艱難使中外之人哺啜嬉遊自若曾無驚
視傾聽竊語之警坐置天下於□□公之力也嗚乎公與狄
梁公皆有惠政於魏故魏人祠之然其爲遠近所尊慕年時
雖遠而不毀非有大功於社稷爲神祇所□□能如是乎□
□公之功顯天下皆知之魏公之功隱天下或未能盡知也
然則魏公不又賢乎宜其□狄公之祠並立於魏享祀無窮
也□□後九年魏人以狀抵西京俾光爲記將刻於石竊惟
梁公二碑乃李邕馮宿之文□□□敢不自量顧魏人之
□□□□又□□其所未知者諗之故不敢辭時元豐七
年六月丙戌涑水司馬光記

安武軍節度冀州管内觀察處置等使持節冀州諸軍事

冀州刺史充河東路經畧安撫使兼馬步軍都總管兼知

太原軍府事及管內勸農

缺

資政殿大學士右光祿大夫知揚州軍州事兼管內勸農

使充淮南東路兵馬鈐轄上□□馮翊

缺

資政殿學士通議大夫知大名府兼北京留守司公事畿

內勸農使充大名府路安撫使馬步軍都總管

缺

案碑載溫公集以石本校之民或爲之生祠集本無民字

皆發於人心之去思集本無心字公旣至集本無至字及

作佛事集本無及字盡心力以事君集本無心字餘缺字

皆如原缺以溫公集世皆知之不必補贅也魏公宋史本

傳云在魏都人爲立生祠卽指此事然碑旣立於大名不

檢何以重刻此文於書錦堂記之陰初疑前明人摹勒爲之及攷韓魏王新廟碑元高書訓所撰也已云歐陽司馬二公之記蔡端明之字光猷萬丈照映千古云是溫公文在元時已置此矣河朔訪古記韓魏王廟庭西書錦堂記碑一通至元間再摹而刻蓋魏都生祠碑轉摹於此石之陰當以此時也

案碑後題銜凡三皆殘缺有充河東路經略安撫使兼馬步軍都總管又有充大名府路安撫使馬步軍都總管嘉泰會稽志國初節度使領馬步軍都步署英宗卽位避御名改稱都總管其後守臣兼一路安撫使者皆帶馬步軍都總管此二題銜在元豐七年正以避諱不稱都步署至

所帶銜亦由大名河東各爲一路故蒞安撫使者循之

西門大夫廟記

佚

楊蒙撰

元祐八年癸酉秋七月予奉檄策定武將辭衡漳遲舟於客館里父老拜堂下曰此地之東有祠曰西門大夫雖時祭不乏而廟制湫陋儀像壞剥冠衣非古邑大夫王君行農而謁焉愴然虔矚曰清塵尙可彷彿衡宇一何摧墜乃鳩材之餘訪利之遺不繁於民不迫於工增亡新敞門廡洞嚴楹藩蔽密命服像儀一規古制予曰彼榱桷之衍廣築室之固潔興訖之始終故不足道獨西門君一邑之長耳生有令名死秩

祀典越歲且久鄉人敬事如在夫殺人仁人不忍也殺一人
生千萬人則殺之勞人仁人不欲也勞一時逸千萬世則勞
之是故三巫沉而俗害釋二渠疏而歲數登直氣英風揭日
月而絕萬世偉矣哉是宜記以文其辭曰

漳水可涸兮君之澤兮方洋洋西山可頽兮君之名兮方巍
巍新厥宇兮神安斯琛諸石兮來者師

舊志

案河朔訪古記西門豹廟有宋修祠碑一通則錢塘楊蒙
所撰其畧曰元祐八年癸酉余奉檄策委定武將亂衡漳
遲舟於客館父老集琴堂下曰此地之東有祠云西門大
夫雖時祭不乏而廟制湫陋邑大夫君行農而謁焉愴然
虔矚廼鳩工修祠云其後辭曰漳水可涸兮君之澤方祥

洋西山可頽兮君之名方嶽魏新厥字兮神安斯環諸石
兮來者師是元末此碑猶存今舊志載斯文將辭衡漳而
訪古記作將亂攷爾雅正義絕流曰亂注直橫流也與衡
漳方相符稱辭爲字形之訛矣拜堂下記作集琴堂亦微
有異蓋納新刪舊其文容或竄易也